

आकाशवाणी जयपुर-अजमेर

प्रादेशिक समाचार

दिनांक 06.12.2024

समय: 18.45 बजे

- रिजर्व बैंक खास दरां मांय कोई बदलाव नी कीनो।
- प्रदेश मांय 15 दिसम्बर ऊं मुख्यमंत्री आयुष्मान आरोग्य शिविर लगाया जावेला।
- संविधान निर्माता बाबा साहेब डॉ. भीमराव आम्बेडकर री बरसी रे मौके आज वां ने सिरधाभाव सागे याद करी ज्या।
- जैविक खेती रा हलका मांय बेहतरीन काम करण वाळा काश्तकारां रो राज्य स्तर माथे मान कर्यो जावेला।

000

आरबीआई री मौद्रिक नीति समिति चार रे मुकाबले दो रा बहुमत ऊं रेपो रेट ने साढे छह फीसदी रा लेवल माथे बणायी राखण रो फैसलो कीनो है। भारतीय रिजर्व बैंक रा गवर्नर शक्तिकांत दास आ जाणकारी दीनी। वे बतायो के स्थायी जमा सुविधा दर सवा छह फीसदी अर बैंक रेट पौने सात फीसदी रा लेवल माथे बणी रेहवेला। बैंक फरवरी 2023 ऊं आं दरां मांय कोई बदलाव नी कीनो है। रिजर्व बैंक नकद आरक्षित अनुपात-सी.आर.आर मांय 50 आधार अंकां री कटौती कर र 4 फीसदी कर दीनो है।

000

राज्य री मौजूदा सरकार रा कामकाज रो एक साल पूरो व्हेवण रा सिलसिला मांय प्रदेशभर मांय मुख्यमंत्री आयुष्मान आरोग्य शिविर लगाया जावेला। सगळा प्राथमिक स्वास्थ्य केंद्रां अर सामुदायिक स्वास्थ्य केंद्रां माथे लगाया जावण वाळा अ शिविर 31 जनवरी ताई चालेला। चिकित्सा अर स्वास्थ्य विभाग री प्रमुख शासन सचिव गायत्री राठौड़ बतायो के आं शिविरां मांय एलोपैथी सागे आयुष तरीका ऊं ईलाज कर्यो जावेला। शिविरां मांय 37 भांत री जांचां मुफ्त करायी जा सकेला। श्रीमती राठौड़ आज जयपुर मांय राख्यी ज्यी मीटिंग मांय आं शिविरां री तैयारियां रो जायजो लीनो अर जनता ने आं रा बारा मांय जाणकारी देवण रा हुकम दीना।

000

जयपुर मांय सोमवार ऊं सरू व्हेवण वाळी राइजिंग राजस्थान ग्लोबल इन्वेस्टमेंट समिट सारू तैयारियां ने अंतिम रूप दियो जा रह्यो है। ई सम्मेलण ने ध्यान राखता थकां जयपुर विकास प्राधिकरण शहर रा न्यारा-न्यारा हलकां ने रूपाळा बणावण रा काम सरू कीना है, ज्यां मांय खास सड़कां, सर्किलां अर चौराहां ने फुलवारियां ऊं सजाया जा रह्या है। सरकारी इमारतां ने रोशनी ऊं सजायी जा रही है। जयपुर विकास प्राधिकरण री आयुक्त आनन्दी बतायो के जयपुर शहर मांय अमर जवान ज्योति, स्टेच्यू सर्किल अर आम्बेडकर सर्किल समेत खास ठोड़ां अर चौराहां ने सजाया जा रह्या है। सजावट सागे जयपुर मांय हिफाजत अर यातायात व्यवस्था रा बारा मांय ई जरूरी बन्दोबस्त कर्या जा रह्या है। सम्मेलण मांय सिरकत करण बाबत् आवण वाळां रा स्वागत सारू पर्यटन विभाग ई खास तैयारियां कीनी है।

वां ने जयपुर री सैर करावण सारू 20 ऊं बत्ता गाइडां री फेहरिश्त बणायी ज्यी है। मेहमानां रा मनोरंजन सारू सैर-सपाटा री ठोड़ां लोक कलाकार कार्यक्रम पेश करेला। निवेशकां रा कित मांय पिकसिटी टूर प्लान शामिल करी ज्यो है अर वां ने जयपुर मांय सैर-सपाटा री खास-खास ठोड़ां रो दौरा करावण सारू विशेष व्यवस्थावां करी ज्यी है।

000

गृह रक्षा बल रो 62वों स्थापना दिवस आज जयपुर कने फतेहपुरा रा केन्द्रीय प्रशिक्षण संस्थान मांय मनायी ज्यो। ई मौके गृह रक्षा बल रा महानिदेशक राजेश निर्वाण 31 अहलकारां अर कर्मचारियां ने डीजीपी डिस्क अर मान पाना दे र नवाजा। वे एक स्वयंसेवक रे मर्यां पाछे वां रा पिरवार वाळां ने मान पानो दे र नवाजा। जयपुर रा नागरिक सुरक्षा निदेशालय मांय राख्खी ज्या कार्यक्रम मांय आयुक्त अनुप्रेरणा सिंह कुंतल अर जिला कलेक्टर डॉ. जितेन्द्र कुमार सोनी री मौजूदगी मांय झंडो फररायी ज्यो। सवाईमाधोपुर रा गृह रक्षा प्रशिक्षण केन्द्र मांय राख्खी ज्या कार्यक्रम मांय झण्डो फहरायी ज्यो अर वाहन रैली निकाळी ज्यी। गृह मंत्रालय री ओर ऊं काल कमाण्डेन्ट स्वाति शर्मा ने महानिदेशक, "रजत पदक अर प्रशस्ति पत्र" अर कम्पनी कमाण्डर चन्द्रशेखर शर्मा, प्लाटून कमाण्डर सत्यनारायण सिंह, सीनियर असिस्टेंट मुकेश कुमार कुमावत, स्वयं सेवक विजेन्द्र शर्मा अर नागेन्द्र मोहन शर्मा ने कांसा रा तमगा अर मान पाना दे र नवाजण रो ऐलाण करी ज्यो। अ तमगा आवता साल गृह रक्षा स्थापना दिवस रे मौके दिया जावेला।

000

केन्द्र सरकार साफ कीनो है के वा साखां री उपज रा खर्च रो डोढ़ा ऊं बत्तो सरकारी मोल देवणो तैय कीनो है। केंद्रीय कृषि मंत्री शिवराज सिंह चौहान आज राज्यसभा मांय पूरक सवालां रा जवाब मांय कह्यो के सरकार किसानों रो भलो करणो तैय कीनो है। वे कह्यो के धान, गेहूँ, ज्वार, बाजरा, रागी, मक्का, तुअर अर मूंग री दाळ समेत दूजी जिन्सां रो सरकारी मोल उपज रा खर्च रा पचास फीसदी ऊं बत्तो राखण रो फेसलो करी ज्यो है। वे कह्यो के कुछ साखां रो सरकारी मोल वां रा खर्च रो सौ फीसदी है।

000

देश संविधान बणावण वाळा बाबा साहेब डॉ. भीमराव आम्बेडकर ने आज वां रा महापरिनिर्वाण दिवस रे मौके सिरधाभाव सागे याद कर रह्यो है। प्रदेश मांय ई ई मौके न्यारा-न्यारा कार्यक्रम राख्खी ज्या। मुख्यमंत्री रा दफतर मांय राख्खी ज्या कार्यक्रम मांय मुख्यमंत्री भजनलाल शर्मा डॉ. भीमराव आम्बेडकर रा फोटो माथे सिरधा रा फूल चढ़ाया। वे कह्यो के बाबा साहेब दलित, पिछाड़ी तबका, महिलावां अर शोषित जनता रा हक सारू लड़ र समाज ने बदलाव री दिशा दीनी। पाली रा राजकीय बांगड़ अस्पताल मांय खून दान शिविर लगायी ज्यो। कांग्रेस भवन मांय राख्खी ज्यी पुष्पांजलि सभा मांय बाबा साहेब री फोटो माथे फूल चढ़ाई ज्या अर संगोष्ठी राख्खी ज्यी। कोटा रा मंडल रेल प्रबंधक रा दफतर मांय पुष्पांजली कार्यक्रम राख्खी ज्यो। भरतपुर रा अंबेडकर भवन मांय डॉक्टर अम्बेडकर री मूरत माथे फूल चढ़ा र वां ने याद करी ज्या। डूंगरपुर मेडिकल कॉलेज अस्पताल रा ब्लड बैंक मांय खूनदान शिविर लगायी ज्यो। केकड़ी जिला मांय टोडारायसिंह रा सरकारी कॉलेज मांय राख्खी ज्या कार्यक्रम मांय संविधान बणावण, महिलावां री भणार्ई-लिखाई अर पर्यावरण ने बचावण सारू बाबा साहेब रा योगदान ने याद करी ज्यो। जैसलमेर जिला रा पोकरण मांय कांग्रेस रा दफतर मांय देश का संविधान और भारतीय नागरिकों के अधिकार मुद्दा माथे संगोष्ठी राख्खी ज्यी। शाहपुरा जिला रा सांगरिया चौराहा माथे जिला कलेक्टर री मौजूदगी मांय खूनदान शिविर लगायी ज्यो। रक्तदान शिविर का आयोजन हुआ। सीकर रा शेखावाटी विश्वविद्यालय मांय ई मौके श्रद्धांजलि कार्यक्रम राख्खी ज्यो। नीम का थाना, सवाईमाधोपुर, बालोतरा, बाड़मेर, हनुमानगढ़, जालौर अर चूरू मांय ई ई मौके खास कार्यक्रम राख्खी ज्या।

000

राज्य मांय जैविक खेती रा हलका मांय बेहतरीन काम करण वाळा तीन किसानों ने एक-एक लाख रुपया दे र राज्य स्तर माथे नवाजा जावेला। कृषि विभाग रा संयुक्त निदेशक राकेश कुमार पाटनी जयपुर मांय आ जाणकारी दीनी। वे बतायो के राज्य स्तर रा ईनाम सारू लारला पांच साल मांय खेतीबाड़ी या उद्यानिकी साखां उपजावण अर दो साल ऊं जैविक प्रमाणीकरण रो काम करण वाळा किसान अर्जी दे सकेला।

जैविक खेती आधारित काम, जैविक उत्पाद प्रसंस्करण अर संवर्धन, वर्मी कम्पोस्ट इकाई, हरी खाद, फसल चक्र आदि करण वाळा किसानों ने 31 दिसंबर ताई तैय फॉर्म मांय अर्जी देवणी व्हेला।

000

सशस्त्र सेना झण्डा दिवस काल मनायो जावेला। राज्यपाल हरिभाऊ बागडे इण ऊं एक दिन पैली आज देश सारू सब-कुछ बलिदान कर देवण वाळां ने याद कीना। ई सिलसिला मांय सैनिक कल्याण विभाग रा

निदेशक ब्रिगेडियर वीरेंद्र सिंह राठौड़ राज्यपाल रे प्रतीक रूप मांय बैज लगायो। ई मौके राज्यपाल कह्यो के सशस्त्र सेना झण्डा दिवस शहीदां अर वां रा पिरवार वाळां रा प्रति कृतज्ञता जतावण रो मौको है। राज्यपाल ई दौरान पैली वाळा फौजियां सारु वां री ओर ऊं मदद री रकम दीनी। मुख्यमंत्री भजनलाल शर्मा ई सशस्त्र सेना झण्डा दिवस री शुभकामनावां दीनी है। वे कह्यो के ओ दिन वां जांबाज फौजियां रा प्रति एकजुटता बतावण रो दिन है, जो देश सारु सब कुछ निछावर कर दीनो। सैनिक कल्याण विभाग रा निदेशक मुख्यमंत्री ने झण्डा रो बैज ई लगायो। सशस्त्र सेना झंडा दिवस रा सिलसिला मांय आज बाड़मेर मांय एनसीसी कैडेट्स साइकिल रैली निकाळी। नीम का थाना तहसील हलका मांय एनसीसी कैडेट्स जन जागरूकता रैली निकाळी। सशस्त्र सेना झण्डा दिवस रे मौके काल पूरा राज्य मांय कार्यक्रम राख्या जावेला। जयपुर मांय सैनिक कल्याण विभाग री ओर ऊं अल्बर्ट हॉल ऊं जनपथ ताई “विंटेज जीप रैली” राखी जावेला।

000

सीकर मांय आज राखी ज्या खास कार्यक्रम मांय राज्य सैनिक कल्याण सलाहकार बोर्ड रा अध्यक्ष प्रेम सिंह बाजौर शहीदां रा पिरवार वाळां ने अनुकम्पा नियुक्ति पत्र दीना अर मदद री रकम रा चैक संप्या। ई मौके बाजौर कह्यो के शहीदां री बदौलत ही म्हां देश मांय हिफाजत सागे रह रह्या हां।

000

चित्तौड़गढ़ रा सांवलिया सेठ मिन्दर रा भंडार मांय 35 करोड़ रुपया री नकदी मिली है। लारला सप्ताह छह दौर मांय व्ही गिणती मांय ई सागे ई अढ़ाई किलोग्राम सोनो अर 64 किलोग्राम चांदी ई मिली है। ध्यान जोग है के लारला साल ई मिन्दर रा भंडार ऊं करीब 15 करोड़ रुपया री नकदी मिली ही।

000

बाड़मेर रा भगवान महावीर टाऊन हॉल मांय आज स्तन कैंसर जागरूकता सेमीनार राखी ज्यो अर मुफ्त जांच शिविर लगायी ज्यो। शिविर मांय स्वास्थ्य विशेषज्ञ स्तन कैंसर रा बारा मांय जाणकारी दीरीजी अर मुफ्त जांच रो सुबीतो मुहैया करायी ज्यो।

000

डीग जिला मांय काली बाई भील मेधावी छात्रा अर देवनारायण छात्रा स्कूटी योजना रा तैत साल 2023-24 सारु सरकारी स्कूलां री 122 टाबरियां ने स्कूटी दी जावेला। स्कूटी देवण रा काम रा नोडल संस्थान मास्टर आदित्येंद्र राजकीय महाविद्यालय डीग रा प्राचार्य डॉ. दिलीप सिंह आ जाणकारी दीनी। वे बतायो के राज्य री मौजूदा सरकार रा कामकाज रो एक साल पूरो व्हेवण रे मौके 14 दिसंबर ने स्कूटी देवण रो कार्यक्रम राख्यो जावेला। ई सागे दिव्यांग छात्रावां ने ट्राईसाइकिलां दी जावेला।

000

बालोतरा मांय आज रेंज स्तर रो पुलिस सम्मान कार्यक्रम राखी ज्यो। जळसा मांय जोधपुर रेंज रा महानिरीक्षक विकास कुमार सुरक्षा सखियां, सराहवणा जोगा काम करण वाळां पुलिस री मदद करण वाळां, तमगा जीतण वाळां अर पुलिस महानिदेशक डिस्क जीतण वाळां रो मान कीनो।

000

माय भारत पोर्टल रे मार्फत 25 नवंबर ऊं सरु करी ज्या विकसित भारत यंग लीडर्स डायलॉग कार्यक्रम मांय शिरकत करण सारु अर्जी री आखिरी तारीख 10 दिसम्बर ताई बधा दीरीजी है। पैली आखिरी तारीख आज ही। ई कार्यक्रम मांय देशभर ऊं चुण्या जावण वाळा 3 हजार नौजवानां ने राष्ट्रीय युवा दिवस रे मौके प्रधानमंत्री नरेंद्र मोदी सामी बात राखण रो मौको मिलेला। विकसित भारत चुनौती होड़ चार दौर मांय राखी जावेला।

000

